



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

Tir Yimiyim

tiryimiyim@aolima

tir yimiyim

TAPAK 3

Angati ration agütsüba ajanga sensakertem nem teyari tulu agütsüdar: Modi

Garo Hills nung telungpurtem tentetshir: Mukul Sangma



VOL. XVIII NO. 291 (ADOK 291) DIMAPUR

RASEMNÜ (WEDNESDAY)

LUROI (AUGUST) 04, 2021

₹ 5.00

## COVID-19 Nagaland: 68 dak putet, 99 taneptsü angu & 3 asü

**Kohima, August 3, 2021 (TYO):** Mongulbarnü Nagaland nung nisung 68 dak COVID-19 putet aser nisung 99 taneptsü angu.

"Tanü nisung 68 dak COVID-19 aliba putet. Parnokji Dimapur nung 19, Kohima nung 15, Mokochung nung 14, Mon o Phek nung pezüzü (4), Peren o Tuensang nung asemsem (3), Kiphire o Zunheboto nung anana (2) aser Longleng o Wokha nung kaka (1) lir. Parnok züngsema nisung ajak agi 28,072 kümogo" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Mongulbarnü COVID-19 agi shiranger nisung 99 taneptsü angu. Parnokji Kohima nung 37, Dimapur nung 28, Mokochung nung 18, Tuensang nung 9, Phek nung 5 aser Longleng o Wokha nung nung kaka (1) lir. Parnok züngsema nisung 25,437 taneptsü nguogo" ta paisa ashi.

"Nagaland nung COVID-19 nungi taneptsü angur 90.61%

kümogo aser nisung 1,261 anepaludar" ta Dr Kikon-isa ashi.

Mongulbarnü COVID-19 puteta alir nisung 3 asü. Parnokji Dimapur, Kohima aser Mokochung nung kaka liasü. Parnok züngsema nisung 577 süogo saka nisung 14 bo tanga tashidak ajanga asü, ta paisa metetdaksü.

"Tang tashi nung COVID-19 alitsü akok ta temolung melemi bilemba sample 267,471 tendangogo. RT-PCR ajanga 103,107, TrueNat ajanga 68,556 aser Rapid Antigen Test ajanga 95,809 tendang" ta Dr Kikon-isa ashi.

"Hombar tashi nung nisung 621,800 nem COVID-19 vaccine indang dose 774,788 agütsüogo" ta State Immunization Officer, Dr Ritu Thurr-ia metetdaksü.

"Vaccine agirtemji frontline workers 60,815, healthcare workers 15,973, arishi küm 45 ser tempur 186,161 aser arishi küm 18 nungi 44 tsüingda alir 358,851 lir" ta paisa ashi.

## Kin 5-i ASTD aser NCD dang telangzüba meshir

**Dimapur, August 3, 2021 (TYO):** Dimapur nung kin hoho 5-i Ao Senso Telongjem Dimapur (ASTD) aser Naga Council Dimapur (NCD) dang August 12, 2021 matongdang MoU indang osang tejangja metetdaksütsü mapang atakzütsüogo.

"July 26, 2021 nü NCD-i Tribal President nem shidi agütsüba nung onok kintem nungi shimba councilor magizükba shia lir. Iba dak sendakba nung Tribal councilor kar magizükba aser ASTD-i acha-ayanga MoU ka sign asüba yimjak nung jembitsüsa akümer" ta Dimapur nung kin pungu hohoi ashi.

May 6, 2021 nü ASTD kübok NSD nung telok na tsüingda MoU sign sütep aser iba ya telok ana tsüingda angatetteptsü atema liasü. Ajisüaka, tanü tashi mapa kecha meinyak saka NSD ketdangpurtemi Ao, Chakhesang, Tangkhul, Mao Pomai aser Rengma nungi Councilor tem magizük. Maneni, ASTD-ia MoU mapa kuma inyaksü melena

asaa toksür aser miim tebilemba kar yur NCD lemdangtsü meranger, ta parnokisa ashi.

NCD constitution nung councilor tem ya pei pei kin teloktemi shimer aser parnok madak NCD tashi kecha mali. Ajisüaka, tang NCD ketdangpurtemi NCD constitution alema kintemi shimba councilor tem magizük aser iba ya kintem mezüingmeshiba lir, ta kin hoho 5-isa metetdaksü.

"August 12, 2021 tashi nung ASTD aser NCD-i MoU indang osang tejangja memetetdaksüra, onoki junger ta bilemba inyaka aotsü" ta Pomai Hoho, Dimapur President K.A Jotham, Mao Hoho, Dimapur President M. John Kape, Tangkhul Hoho, Dimapur President Ayo Vashum, Western Chakhesang Hoho, Dimapur President Z. Kepfelhou aser Rengma Public Organisation, Dimapur President Wanhang nungertemi mapang atakzütsüogo.

## NSCN/GPRN-i CIHSR aser yariteper ajak dang pelar

**Dimapur, August 3, 2021 (TYO):** Christian Institute of Health Sciences and Research (CIHSR), Dimapur nung NSCN General Secretary, Th. Muivah hopta ka tashi kanga junga anepaluba atema doctor, nurse, staff aser ketdangsür ajak dang pelar ta NSCN/GPRN-i metetdaksü.

"Wara agi kangshiba mapang CIHSR nung inyakertemi Th. Muivah dang masü saka teyari bushii arur ajak anepalua yariba atema tenüngsang agütsür. Nenoki bendanga agüja inyakba atema pelar aser tarutsü anogotem nunga nisung takütem kümzüksü atema

CIHSR nung doctor, nurse aser staff ajak anema yujang ta sarasademtsür" ta MIP, NSCN/GPRN-i sangdong ka nung ashi.

Tsüingrem dak amangertem nem Pai moatsür aser Pa temeim aser taneptsüba tashi atema pelar. Naga arogotem, arogo lennirtem aser Nagalim ajungalen temeimertemi sarasademtsüba atema pelar. Maneni, Naga nung aser Naga Civil Society Organizations (CSOs)-i tebilemstü bona yaritepba atema pelar. Talisa Nagaland State sorkaria akokba lenmang ajak agi teyari agütsüba atema pelar, ta MIP, NSCN/GPRN-isa ashi.

## Nagaland Assembly-i tatemzükba kecha melii yimten olemtep tenzüktsü ayongzüker

**Kohima, August 3, 2021 (TYO):** Nagaland Legislative Assembly züngsem ajaki Centre sorkar aser Naga yimtenren loktem dang Naga yimtenren olemtep tenzüktsü aser tekaratiba nung angatetteptsü mepishitsü telemtetba agiogo.

Mongulbarnü Nagaland Legislative Assembly (NLA) indang monsoon session mezüing anogo nung iba ya lemte.

Tanü Planning & Coordination, Land Revenue and Parliamentary Affairs Minister, Neiba Kronu-i iba onük benok aser Chief Minister Neiphiu Rio o Leader of Opposition T R Zeliang na dena MLA 15 shi kati jembia liasü.

Tanü NLA-i onük 5 bangzüngtepdang "tangatetba tajung nung aser tatemzükba onük kecha melii aser kati ka akhümsümbua Indo-Naga yimtenren olemtep tenzüktsü" ta tayongzükba agütsüogo.

Naga yimtenren teloktem longjemtsü aser putepshitsü atema merangtsü ayongzüker. Telok ajaki yimjung bener arutsü aser yimten latettsü atema kasa tangatetba yur inyaker saka yimjak nung kati ka anema jembiba ajanga lokti nem osang tai sangoktsür, ta NLA-isa metetdaksü.

NLA nung züngsemtemi party telemsa melii Naga yimten tebilemstü atema longjemogo anungji Naga yimtenren teloktemia longjemtsü asoshi merangtsü aser nübertemi ola adokba angatsüla, ta parnokisa ayongzük.

Arogotem, lokti tentetem, kin hohotem aser NGO temi shilem tajung agiba aser yimjung maparen tashi itdaksüba atema tenüngsang agütsür. Maneni nenoki telongjem, putepshiba aser ka akümsü atema inyaka tekaratiba nung yimten latettsü asoshi yaritepdaksünür, ta NLA-isa metetdaksü.

Political Party ajak indang election manifesto nung nübertem dang ajaki agizükteba telemtetba ka agira menden toktsütsü molunga lir ta nangzükba nung Nagaland MLA ajak noktaka lir. Anungji Naga yimtenren teloktemia ka akümsüla aser nübertem nem 'Telemtetba Ka aser Tenangzüktepa Ka' agütsütsüla, ta parnokisa ayongzük.

1964 nungi Nagaland State Assembly-i Naga yimten tebilemstü atema bangzüng 13 tashi agiogo.

"Asenoki tom nung manentettsü kechiyong public dang nangzükogo. Anungji tiyongtsü nung yariteper ka ama asenoki yimten latettsü asoshi inyaksüla. Common Minimum Programme aser party ajak indang election manifesto nung Naga yimten tebilemstü asoshi yariteptsü nangzükba lir" ta tanü assembly nung olemtepdang Minister Kronu-i ashi.

"Centre-i NSCN(IM) aser Naga National Political Groups (NNPGs) tenet indang Working Committee den jembia arur. NSCN(IM)-i Framework Agreement aser WC-i Agreed Position nung ajemdaker Centre den jembir. Telok anaprongi India sorkar den alizüng ka atema jembitsü atema longjemdaksütsüla" ta paisa metetdaksü.

"Naga yimtenren teloktem atemabo mapang alitsü akok saka asenok atemabo mapang mali, kechiyong election tonga arur. Iba tebilemstü ya mekoktetra inyaksangshi nung timtem bentsür arutsü aser iba jagi asenok ajak dak kongshitsü. Anungji olemtepertem den jembitsü tang ya mapang tongtipang lir" ta Kronu-isa ashi.

"Naga nung shia atema yimten latettsüba ya tongtipangtiba onük lir. 1964 nungi NLA-i bangzüng ka khen ka ta agia arur" ta Independent MLA aser PWD (Housing) Minister, Tongpang Ozukum-i ashi.

Paisa Naga yimtenren teloktem dang tesüiba mapang aibelenbatem amadoktsü aser Naga nungeri aginüba ama longjemtsü ayongzük.

"Naga yimtenren teloktemi akhangba onüktem menguaka Naga nungeri pusema nungiter. Anungji Naga yimtenren teloktemi nübertemi adokba ola angashitsüla" ta Minister Tongpang-isa metetdaksü.

"Telok anaprongi angüma malui tekong merangteper. NSCN(IM) aser India sorkar nati telemtetba agitsü atema süoki ia bilemer süra angüma alur angatetteptsüla" ta NPF MLA Imkong L. Imchen-ia ashi.

"India sorkar aser NSCN tsüingda 1997 nung Ceasefire Agreement nung sign sütep aser iba sülen küm 24 süia olemtepa arur. Küm ka dang lirbo Silver Jubilee asütsü" ta Opposition Leader, T R Zeliang-ia ashi.

Tanü August 3 nü NSCN (IM) aser India sorkar tsüingda Framework Agreement nung sign asüba sülen küm 6 abensar

asir külen November 17, 2017 nü Agreed Position nung sign sütepba sülen küm 4 ajungtsü, ta paisa metetdaksü.

"Item tenangzüktepa balala ajanga nübertemi Naga yimten latettsü aser Nagaland nung teti atema yimjung bener arutsü ta teimla tulu liasü. Anungji, tesüiba dang nungi tashitaitba nung NLA züngsem ajaki yimten latettsü asoshi inyaksüla" ta TR Zeliang-isa ashi.

"Ajisüaka Naga yimtenren teloktem aser India sorkar tsüingda tekong merangtepa ya tebilemstü aser shisabulutsü khuret ka lir" ta paisa ashi.

Naga nung aser talisa NPF Party-i Naga yimtenren teloktem angatetteptsü aser nükjidong ka atema longjemdaksünür, ta Zeliang-isa metetdaksü.

"India sorkari NSCN(IM) aser NNPGs tsüingda Framework Agreement aser Agreed Position sign sütepogo aser October 31, 2019 nung olemtep tembangogo ta shir, saka onük kar ano mangatettep lir" ta Chief Minister Neiphiu Rio-ia ashi.

Olemtep tembangogo ta ashidang Centre-i wako, Naga nung alidak ka akümsüba aser temzüng magütsütsü ta mashi saka yimten latetba sülena jembitsü ta ashi, ta Rio-isa metetdaksü.

"Yaküm ni Union Home Minister Amit Shah den temzüng aser wako atema jembidang, Naga nung alidak ajak ka akümsüba saka akümsü atema pan-Naga Hoho (body) tentettsü aser pan-Naga Hoho nem wako ka agütsütsüba akoktsü ta pai ashi" ta Nagaland CM-isa metetdaksü.

"Anungji, Naga Constitution atema tangatettep lir. MLA tem dang masü saka Naga yimtenren teloktem aser civil society tem longjemer inyakra yimten latettsüba takoktsü lir" ta paisa ashi.

Tanü assembly nung olemtep sülen CM Rio-i onük pungu aliba bangzüng benok aser NLA Speaker Sharingain Longkumer-i atema vote agidang MLA ajaki pusema agizük.

Olemtepdang Tourism Advisor Khehovi Yephthomi, H Chuba Chang, Advisor Dr Longrineken aser Opposition MLA tem- Kuzholuzo Nienu, Dr Chumben Murry, Dr Chotisuh Sazo, Yitachu aser YM Yellow nungertemi shilem agia liasü.

## DoSE-i school tem kümdangtsü metetdaksür

**Dimapur, August 3, 2021 (TYO):**

Nagaland nung August 2, 2021 nungi class 11 aser 12 lapoktsü atema school temi pei pei District Task Force (DTF) nungi temelaba meshitsüla ta Department of School Education (DoSE)-i

metetdaksüogo.

July 19, 2021 nü state sorkari tetuyuba agütsüba nung school ajaki SOPs sülen anidaktsü shia lir. Anungji DTF nungi temelaba mangu tashi school temi online teaching agia atatsüla, ta DoSE-

isa ashi.

DTF nungi temelaba magii school temi class 11 aser 12 lapoktsü memelar aser ano sorkari temelaba magütsü tashi tanga class tem asoshi school melapoktsü nenshir, ta DoSE-isa metetdaksü.

### DC Dimapur aser HODs tem I-Day atema senden amen



Dimapur DC, Rajesh Soundararajan IAS ajanga Dimapur district kübok aliba HODs ajunga den senden ka August 3, 2021 nü aliba noksa nung angur.

**Dimapur, Luroi/August 03 (TYO):** Deputy Commissioner, Dimapur, Rajesh Soundararajan IAS ajanga Dimapur district kübok aliba HODs ajunga den senden ka August 3, 2021 nü DC Dimapur indang Conference Hall nung ayonga mena liasü.

Iba senden ya 75 buba Independence Day atema sentong yanglutsü asoshi ayongzüka liasü.

Home Department totuyuba den bendenloksema Deputy Commissioner, Dimapur ajanga

ashiba agi, taküm Independence Day benjongmung nung adenertem asoshi ozüing yanglua social distancing aser danga COVID-19 tashidak nungi jenbutsü mechi amshiba yimyatem amshitsü.

Ajisüaka pai HODs tem dang staff ten iba anogomung sentong nung medema arua adentsü totuyuba agütsüsü shia liasü.

Iba anogomung sentong takok ngua agitettsü mechi iba senden nung department balala nem mapa lemezükja liasü.

Home Department totuyuba nung shia aliba ama küm 75 ajungba nungtem nung August 9 nungi August 14, 2021 tashi Dimapur district nung sentong balala agütsü. Iba dak sendakba nung department balala ajanga workshops, rallies, süngtong atempa, mürekmejuba mapa tem inyaksü, essay aser painting tetoktepba ayongzüksü, Traffic Police, Commissioner of Police indang office ajanga Road Safety Rally aser danga sentongtem ayongtsü lemteta liasü.

### Tuensang DTF puri Unlock-4 inyakyim asoshi senden amen

**Dimapur, Luroi/August 03 (TYO):** Tuensang District Task Force for COVID-19 pur senden ka Deputy Commissioner indang Conference Hall nung August 3, 2021 nü mena liasü, aser iba senden ya Deputy Commissioner aser Chairman DTF Tuensang, Kumar Ramnikant lenisüba kübok agia liasü.

District nung COVID-19 mozü agiba tsütsü HODs temi shilem tulu agiba atema Deputy Commissioner ajanga tenünsang agüja liasü.

Tang tashi COVID-19 mozü

magi aliba yimtsüngtem nung oa iba tashidak wara nungi jenbua alitsü atema nisung kija shia shilem angatetdaksütsü asoshi pai kin lenirtem dang asüngdanga liasü.

Iba senden nung züngsemtemi district nung Unlock 4 atema tensa asadanga liasü. Hopta tsüngta district nung COVID-19 tashidak putetba asoshi süoki ia senden nung jembia.

Kaket reju tanaben lapoktsü atema tensa asadang aser SOP check list nung aliba ama kaket reju tem tsüngtong oa asadanga kaket reju tanaben lapoktsü

melatsü aser kasaji Tuensang District Task Force on COVID-19 pur nemo sang agütsütsü asoshi jila aser sub division nung education officer nem nungloksütsü lemtet.

Government Polytechnic, Sedem tanaben lapoktsü aliba mechi iba reju nung Covid Care Centre lapoka aliba ya August 11, 2021 nü shibanga kasaji District Hospital Tuensang nung amenoktsü jembia liasü.

Senden nungsa district nung COVID-19 mozü agütsüba aser iba tashidak tendangba maparen tali ulushitsü jembia liasü.

### Ao Region NSCN/GPRN-i pelaba lemsateper

**Mokokchung, Aug 3 (TYO):** Naga nung yimden telatetba tajung ka makai küm 68 tashi arua 2015 küm yimdenji lateta ayutsü asoshi NSCN/GPRN aser Government of India tsüngta 3rd August, 2015 nung Framework Agreement sign sütepa ken-o maparen tenzüik. Saka küm trok (six years) tashi arua GoI-i

telemtetba tajung ka magütsüet nung, NSCN/GPRN-i kasa anogo, 3rd August 2021 nung Nagalim ajunga nung mokdanga nikong 12:00 ako tashi shishilembaba ajunga shibanga ayutsü mepishia ayimoktsüba ama, asen Aor-i Naga yimdenji tongtibang ta angateta kecha pesaprong makai takok ngua

tembangtetba asoshi NSCN/GPRN Ao Region CAO, P. Lima Kichu aser Secretary, Lidener nati Ao lima yimtsüing ajunga nung yimsüsür, Mokokchung Chamber of Commerce & Industry (MCCI), Aor lokti senden balala aser sensosanger ajak dang kanga pelaba sangdong ka ajanga metetdaksü.

### Akumen yimdak süngolu ayimtsü seminar agütsü



**Dimapur, Luroi/August 03 (TYO):** Mokokchung district kübok Akumen yimtsüing nung "Smart Tea Farming and Networking" omen nung ajemdaker seminar ka AYULCR TEA PRIVATE LIMITED company ajanga ayongzüka agia liasü. Iba seminar nung anasa aliba Tsüremen yimtsüing nungia süngolu ayimer arua dena liasü.

Iba sentong nung Ayulcr Tea

Pvt. Ltd indang director, Yanger menden liasü aser Akumen Baptist Church nungi pastor Anok ajanga Tsüngrem temoatsü jazüka sarasadema liasü.

Sentong nung Ayulcr Tea Pvt. Ltd indang Managing Director, Lima Jamir ajanga "Smart Tea Farming and Networking" omen nung ajemdaker jembia.

Iba sentong nung jembiba

mapang, "Asenoki lanu putu atema inyaksütsü nungdaker, kechiaser asenoki asen sasa asen peria alitsü angazüktsüla aser tilaka nungi tenzüka state indang rongsenketsüing tanemtanemi ajungkettsütsüla," ta pai ashi.

Asen otsüla-oboula nungertemi meranga inyaka aru, anungji asenoka parnok sülen anidaka meranga inyaksüla, ta paisa ayongzüka liasü.

### DC Dimapur ajanga Coffee Bar-Native Brew sayatsü

**Dimapur, Luroi/August 03 (TYO):** Deputy Commissioner, Dimapur, Rajesh Soundararajan IAS ajanga District Project Officer, Land Resources Department, Dimapur indang office nung August 3, 2021 nü Coffee Bar-Native Brew sayaja liasü.

Tesemdanger tongti ka ama iba sentong nung jembiba mapang department-i iba ama mera agiba asoshi Soundararajan-i tenünsang agütsü aser alima nung aser linük nung coffee agir tali kumogo, ta ashi.

Coffee Board of India teyari nung department aser state ajanga coffee tsünütsü asoshi maongka bushitsü tang mapang shidak lir aser market tesendaktep tajungba kumdaksütsü aser coffee processing tuluba akumtsü mapang tajung ka lir, ta pai ashi.

Alima nung coffee timtiba adokdaksüba linüktem rongnung India ya jenjang 6 buba nung lir, aser ano coffee ya tang dang nungi shilem 15 nungi 18 agi tali adokdaksütsü nükjidong lir, anungji department-i awareness sentongtem agia maneni coffee lu ayimer yaritsü, pai ajungshia liasü.

Iba sentong nung Deputy Director, Land Resources aser Dimapur District indang Supervisor, Puvil Kikhi-i Nagaland nung coffee tsünüba indang otsüren jembiba mapang, Coffee Board of India (CBI) aser Government of Nagaland lungjemer 1981 küm Nagaland Plantation Crop Development Corporation tenzüka coffee tsünü tenzüik aser tamakok majurui aru, ta ashi.

Ajisüaka CBI ajanga coffee lu ayimer atema market anepalu mesüetba yong Wokha, Mokokchung, Mon aser Zunheboto ama district kar dak alaka aluyimer temi coffee lu sentong nung zütsü, ta pai ashi.

Paisa ashiba agi, 2014-15 mapang CBI ajanga Land Resources Department den sensaksema coffee lu ayimtsü atema molungtep aser MoU ka zülutepa liasü.

Tang Nagaland nung coffee ya ali hectare 8.996 nung yoka lir, aser taoba küm kisüing nunga CBI den lungjemer ali hectare 1,003 nung coffee tsünüba liasü, ta pai ashi.

2020-30 atema department indang nükla lemsatepba mapang, department ajanga ali hectare 50,000 nung coffee tsünütsü atemzuka lir aser iba maparen

tenzüikogo. Asenoki ali hectare 50,000 nung coffee lu yimtetra, state nung revenue sen crore 1,630 adokdaksütsü, ta Kikhi-i ashi.

2019-20 tsüngta department ajanga coffee tuozük metric tonnes 27.5 tashi South Africa nung company, Nobel Cause dangi yokogo aser iba company den küm 30 atema memorandum ka zülutepa lir, ta pai ashi.

Nagaland nung adokba coffee product ajunga iba Company yagi alizüktsü molunga lir, ta pai metetdaksü.

Department nungi nisung ana coffee anepalutsü atema Kathmandu nung aliba British Coffee School nung training agiogo. Training agir alirtemi Nagaland nung aliba district ajunga nung mapa mongui aliba lanurtemi nem training agütsütsü aser iba sentong ya taküm August 10 nungi tenzüksü aser lanurtemi pei district tem nung coffee bar amenoktsü, ta Kikhi-i ashi.

Department-isa butterfly pea tea, gooseberry tea, sumac tea, fresh ginger tea, rosella tea, cinnamon aser moringa tea amala 'natural tea' temaba jenjangi ajungkettsür, koba jenjangi tajemba, temelaba nung renemer aser temang nung teyari agütsür, ta pai ashi.

Natural tea aser coffee tem ya ajak organic dang lir, anungji nüburtemi market nungi alitsü melena temang atema teyari tali agütsütsü mechi pei sasa tsünüa ajemtsü ajungmesoa "Drink what you Grow" yimyim sangdonga lir, ta Kikhi-isa ashi.

Iba sentong nung DPO, Dimapur, Land Resources Department, I. Acato Chishi-ia coffee ya enterprise ka ama amshitettsü, ta ashi. Nagaland nung coffee ajemba yimya sübadaksütsü nükjidong nung coffee bar-i aruk ajak nem (American, Espresso, Latte) coffee drinks angati agütsütsü, ta pai sangdonga liasü.

Iba sentong nung ADC Dimapur, Atokhe; CCF, Hukato Chishi, IFS; Jt. Director, Industries and Commerce, Tokugha; DHO Dimapur, Temsu Longkumer; District Soil conservation officer aser DPRO Dimapur, Lolano Patton nungertem dena liasü.

Iba sentong nung Assistant Inspector, LRD, Aoyanger menden liasü aser Grace Kikon-i tepela ankep o jembia liasü.

### Labour Commissioner ajanga metetdaksür

**Dimapur, Luroi/August 03 (TYO):** Indian Labour Conference (ILC) indang Session 44, 45 aser 46 buba ajanga benokba aser kinük balala nungi akhangba ama Government of India ajanga Maternity Benefit (Amendment) Act, 2017 melena Maternity Benefit Act, 1961 amend süogo, ta Labour Commissioner, Er. S. L. Wati Aier ajanga sangdong ka nung metetdaksü.

Iba amendment kübok tongtipang provision ka ji tanur bentsüa aliba tetsü tem kidang nungi mapa inyaksü melar.

Iba Act indang Section 5 (5) ajanga ashiba agi, "Tetsür ka nem nungloksüba mapa ya lai kidang nungi inyaktetsüsa süra, maternity teyari agir aser employer aser tetsürta tsüngta tangatetep nung la nem kidang nungi mapa inyaksü melatsü."

Tang COVID-19 tashidak wara pokteta aliba tensa nung nubentsür tetsütem ya timtem balala ajurutsü jenjang ka nung

lir aser iba ama jenjang nung aliba nüburtem coronavirus tashidak nungi kumzuka ayutsü kanga tongtipang, ta ashi.

Nubentsüba tetsütem kidang nungi mapa inyaksü melaba ajanga parnok aser par kinü tanurtem tashidak wara nungi kumzüktsü.

Tang tensa nung kidang nungi mapa inyaksü melaba ya mera tajung ka lir aser iba yimya ya tetsür mapa inyaker asoshi bulua amshidaktsütsü nungdaker aser mapa agi melara nubentsür tetsürtem tali kidang nungi mapa inyadaksütsü employer dang ajungshir, ta ashi.

Nubentsür tetsürtem tanur asoba anogo nungi zünga küm ka bo sa kidang nungi mapa inyaksü melatsü.

Anungji mines, plantations, dokan aser establishments (organized sector mesüra unorganized sector naprong nung) aser factory tem kiburi iba sangdong sülen anidaksü ajungshir, ta ashi.

# Arunachal nung mozü achir 32-i bamboo pipes agütsü



**Dibrugarh, August 3, 2021 (Agencies):** Arunachal Pradesh kübok Changlang district nung mozü achir 32-i parnok mozü achidang amshiba 'bamboo pipes' agütsü aser drug de-addiction asütsü molunga agizükogo.

Changlang district police-i temeim mapa sayua de-addiction centre nem carrom board ka tenla agütsüogo.

Changlang superintendent of police Mihin Gambo-i

Jongphohate nung Nasha Mukht Bharat Abhiyan-i acha-ayanga reprangba de-addiction centre semdanga liasü.

"Iba inyakyim ajanga tangartem ajungmesotsü. Changlang district nung opium addicts khuret lir saka tawa mozü achir aikati opium toktsütsü telemtetba agiogo" ta osang ka ajanga ashi.

Arunachal Pradesh sorkaria mozü achiba atema awareness programmes aika ayonga

agiogo. Sorkarisa mapa inyakterem rongnung drug addicts anema mapa tenzükogo.

Yaküim May ita West Kameng district police-i Postmaster ka apu. Parnokisa Indian Reserve Battalion constable ka apu.

Tena apuba sülen Arunachal Pradesh sorkari par mapa inyakteremia mozü achir ta temolung melemi bilem aser iba jagi mozü achirtem dang parnok bangdak ketdangsur nem osang sangoktsütsü tetuyuba agütsü.

# Garo Hills nung telungpurtem tentetshir: Mukul Sangma

**Guwahati, August 3, 2021 (Agencies):** Meghalaya indang Garo Hills region nung telungpur teloktem tentetshir ta taoba chief minister Mukul Sangma-i ashi.

"Garo Hills nng telungpurtem tentetshiba ya state sorkari süoki ia bilemtsüla. Telungpurtem prangpong tajung bener senzüba osang onoki angashiogo" ta Sangma-i osangbener dang ashi.

Congress-i telungpur teloktem mita anükba aser parnok tentetshitsü atema inyakyim noktanga maparen ajak Conrad Sangma-i aniba NPP sorkari anenogo, ta paisa tai tongloksü.

Tesüiba ita asem tashi telungpur teloktem tentetshiba osangtem angazüka arur ta West Garo Hills district SP Vivekananda Singh-ia ashi.

"Police headquarters-i iba maparen tiyongtsü maddoktsü

atema tetuyuba agütsüogo" ta pasia ashi.

Telungpurtemi nisung aputsü aser tashiyim agi sen meshitsü atema alizüing yur tentetshir, ta SP Vivekananda-isa shisem.

August 1 nü Ri-Bhoi district kübok Umdo yim nung police-i nisung ka apu aser pa ket nungi tapoktsütem nguteta liasü.

1992 küm Hynniewtrep Achik Liberation Council tentetba sülen nungi Meghalaya nung telungpur telok 21 tashi liasü.

Kin mangatettep adoka parnok Garo National Liberation Army (GNLA) aser Hynniewtrep National Liberation Council (HNLC) ta balala aküm.

GNLC ya ozüingi nokanga lir aser parnok tanishir kar temai adoktsü memolunger. GNLC-i Garo kin atema inyaker aser HNLC-i Khasi nunger atema inyaker.

# Lovlina atema tanü Assam Assembly ghonda tesadang ka magitsü

**Guwahati, August 3, 2021 (Agencies):** Bodbarnü Tokyo Olympics nung Lovlina Borgohain-i semi-final nung tsüingtepang Assam Assembly ghonda tesadang ka atema magitsü.

Lovlina Borgohain-i Turkey tsür Busenaz Surmeneli den

tsüingteptsü. Surmeneli ya world champion lir aser tena Tokyo Olympics nung welterweight women's boxing semi-final nung tsüingteptsü lir.

Lovlina-i quarter final nung Chinese Taipei tsür Nien-Chin Chen madak takok anguba

ajanga India atema Olympics medal ka angutsü lenmang yanglua liasü.

Lovlina ya anaben tashi world championship bronze-medallist lir aser Assam nungi Olympics atema mezüingbuba tetsür boxer lir.

# Arunachal nung medical college tanabuba lapoktsü

**Guwahati, August 3, 2021 (Agencies):** Arunachal Pradesh nung medical college tanabuba lapoktsü.

Namsai district nung medical college ka lapoktsü atema Centre-i molunga agizükogo ta ketdangsur kati ashi.

Arunachal Pradesh Health & Family Welfare Minister, Alo Libang-i anir telok kati New Delhi nung Union Health Minister Mansukh Mandaviya den ajurutepdang iba ya nangzük.

Tang Arunachal Pradesh nung medical college ka lir. Ibaji

Naharlagun nung Tomo Riba Institute of Health and Medical Sciences (TRIHMS) lir.

Union Minister Mandaviya aser Libang nati medical infrastructure, medical equipment aser medical services tajungba akümtsü indang jembi.

Iba mapang Lok Sabha MP Tapir Gao aser Namsai MLA Chau Zingnu Namchoom nati Libang meina liasü.

Parnokisa Arunachal Pradesh nung COVID-19 tensa indang jembi aser wara azoktsü atema tebilembatem lemsatetp.

# Assam-Mizoram arrtsülen lendong jungjunga bushisüngdangtsüla: Gaurav Gogoi

**Guwahati, August 3, 2021 (Agencies):** July 26 nü Assam-Mizoram arrtsülen lendong atalokba atema jungjunga bushisüngdangtsüla ta Congress MP Gaurav Gogoi-i takhangba agütsüogo.

"Police 6 tepset. Kechi atalok'ar osang tejangja metettsüla" ta New Delhi nung Gogoi-i osangbener dang ashi.

Congress-i mezüing tasür kibongtem semdang aser onoki nüktzü nguogo, ta paisa ashi.

"Assam nung Himanta Biswa Sarma indang policy kar ajanga tanga sobaliba ajaki toktsür aor" ta Gogoi-isa ashi.

"Asenoki 7 sisters ta ajar saka ozü Chief Minister-i RSS mesüra Amit Shah peladaktsütsü atema dang bilemer" ta paisa ashi.

State sorkari arrtsü ken o tem atema mapa shitak meinyaktetba nangzüktsüla. Assam nung Tarun Gogoi-i küm 15 yimsü asüdang iba amai majurudang" ta Gogoi-isa ashi.

Congress atema Northeast ya mezüing lir saka BJP atemabo party mezüing lir. Parnok atema Modi mezüing aser iba sülen jiang tanga maparen lir, ta paisa metetdaksü.

Taoba mapang Tarun Gogoi-isa Union Home Minister Amit Shah dang Assam-i kidanger state tem den arrtsü ken o tem adoka aliba atema mapa inyaktsü takhangba agütsüogo.

[7:53 PM, 8/3/2021] AMONG TYY1: Arunachal nung mozü achir 32-i bamboo pipes agütsü

# NLFT telungpurtemi Tripura nung BSF sepai ana khaset

**Agartala, August 3, 2021 (Agencies):** Mongulbarnü Tripura nung India-Bangladesh arrtsü anasa NLFT telungpurtemi BSF sepai ana khaset.

Dhalai district nung aliba RC Nath Border Outpost (BOP) nung telungpurtemi BSF amak

ta osang ajanga ashi. Mongulbarnep 6:00 ako meta NLFT telungpurtemi BSF patrolling party ka amak.

NLFT telungpur 8-10 shi kati BSF patrolling party amakdang Bhuru Singh aser Raj Kumar na khaset.

**GOVERNMENT OF NAGALAND**  
**DIRECTORATE OF TECHNICAL EDUCATION**  
Nagaland : Kohima - 797 004

☎ 0370-2270409  
☎ 0370-2271432

Dated, Kohima the 3rd August, 2021

### NOTIFICATION

NO.DTE/SCTE/6/2020-21/ In pursuance of Government wide letter NO.HTE/TE/14-5/2020/283, Dated, 2nd July, 2021, the selection and nomination of candidate for undergoing 3 (three) years Diploma programmes in various Engineering courses during 2021-2022 will be based on the aggregate marks secured in HSLC/HSSLC.

**Schedule for Selection process**

1. Merit list of the Candidate	: 4th August, 2021
2. Date of result declaration	: 7th August, 2021
3. Last date for Submission of Acceptance/refusal letter	: 16th August, 2021
4. Date of issued nomination letter	: 20th August, 2021
5. Period of admission in Polytechnics	: Shall be strictly as specified in Nomination letter.

Merit list and the selected candidate will be uploaded in the department website [www.dtenagaland.org.in](http://www.dtenagaland.org.in). The selected candidates will be issued nomination letter from 20th - 27th of August, 2021 from the office.

Sd/-  
**(NUNGSANGMENLA IMCHEN)**  
Ex-Officio Director.

Issued by DIPR

**GOVERNMENT OF NAGALAND**  
**OFFICE OF THE PRINCIPAL GOVERNMENT POLYTECHNIC KOHIMA**  
KOHIMA : NAGALAND.

Dated, Kohima the 3rd August' 2021

### NOTIFICATION

Applications are invited from interested candidates to undergo Short Term Training courses at Government Polytechnic Kohima. The courses are offered free of cost under Community Development Through Polytechnics (CDTP) scheme, funded by Ministry of Skill Development & Entrepreneurship (MSDE), Government of India.

Sl.No	Name of the Course	Duration	Eligibility	Intake Capacity
1	Computer Operator / Data entryoperator	3 Months	Class 8 passed	30
2	Cutting andTailoring	1 Month	Class 8 passed	30
3	AssistantElectrician	3 Months	Class 8 passed	30
4	Stenography( For Speed Improvement)	3 Months	Class 10 passed	30

**IMPORTANT INSTRUCTIONS:**

- Admission to all the courses will be on first come first basis.
- Registration fee of Rs.100/- will be charged (one time).
- Photo copy of Aadhaar card and Passport photo will be required during Registration.
- Registration will start from 4th August 2021. Tentative date for commencement of classes: 17th August 2021.

**FOR MORE DETAILS CONTACT:**  
Mobile Phone: 9862376252 (Coordinator)  
E-mail ID : [principal\\_gpk@yahoo.com](mailto:principal_gpk@yahoo.com)

Sd/-  
**(ER.KEYIEKHRU RHUTSO)**  
PRINCIPAL.

Issued by DIPR



# TIR YIMYIM

## YIMOBILEM (EDITORIAL)

DIMAPUR RASEMNÜ, LUROI(AUGUST) 04, 2021

### Tatembosa mekümtettsü

**T**esüiba mapangtem dang nungi tang ya balaka Naga yimten tebilemstü tatem küma latettsü asoshi linük tenzükertemi dang masü saka Nagaland nung tatar yimsüsürtemia temulung tagütsüba agüja jembiba angashir. Iba nükjidadong nungji NPF teloka government nung denogo. Atangji, parnok government nung adenba ajanga kechikomaka tekaraba nung Naga yimten tebilemstü ya latettetdir, ibajibo parnok mapa aser mapangiang ashitsü. Ajisüaka, Nagaland nung yimsüsürtem ajaki Naga yimten ya tama latetmatsüla ta asüba tangatetba nung kenbang obang medembaji ochi mulung süra, yangji takoktsü lir. Ano, külen India government den yimjung lapoka Naga yimten ken o jembir joko küm 20 dak tali süir, anungji India government-ia joko mapang atsülanga moi tekaratiba nung Naga yimten tebilemstü ken o tatem küma latetnua alitsü. Atangji, India government tsütsüa aser Naga nung tsütsüa ajaki tekaratiba nung Naga yimten tebilemstü koka telemtetba kati arunür, ajisüaka ajaki agizüktettsüsa telemtetba onüktem lenjem kati marutetter. Kodang Naga yimten tebilemstü ken o ya tatem küma latetdir, telemtetba jagi Naga nung nümadangtettsüsa aser ajaki junger ta agizüktettsüsa asütsüla ta ajaki jembir. Ibaji jembiba ama mapa küma inyaksübaji temelabo masü. Ashi, shibaibo Naga nung ajaki akhümкета junger ta agizüktettsüsa yimten telemtetba ka maginütsü ? Item tangatetba aser tebilembatemji kodang jungjunga bilemdangdir, kodang südir süang aser koba teloki lemtetdir lemtetang, Naga yimten tebilemstü ken o ya teti asoshi tatem kümabosa melatettettsü ta angatettsü. Naga yimten ken o ya tang Naga nung Myanmar aser India na nung alirtem asoshi yimten nüchiso asoshi raraba otsü lir, anungji India aser Myanmar nung aliba Naga nung lushi aser Naga kin ajak yimten nüchiso akaba linük ka nung temzüng ka aser wako ka kübok kodang yimten ka kümtetdir, idangjiang Naga yimten tebilemstü ya tatem küma arutsü. Ibaji Naga nung shita kba yimten nüchiso bushiba otsü aser nükjidadong lir. Ajisüaka, iba nükjidadongji tang alima tensa aser asenok libaliro aser inyakyim den kodang medemdangdir, tang India o Myanmar na kübok Naga nung lushi aser nübortem lemsar aliba ya linük ka aser yimten ka kübok, ka küma longjemtsüba otsüjibo yutsür, India kübok Naga nung state balala nung lemsar aliba ya state ka kübok longjemtsüba temeten aser tejangraba dena tamakoktsü amai kümogo. Iba kuli aser tebilemstü jagi Naga yimten tebilemstü mekokteti küm paikaya südaka ayur. Aji oda, tang Nagaland assembly nung tatartem rongnung Naga yimten tebilemstü ken o tatem küma latettsüba nung yariteptsü asoshi parnoksa tentetba 'Parliamentary Core Committee'-ia komaka bilemar ashitsü makok, saka Naga yimten tebilemstü ken o ya Naga nung rangben asoshi khen nungbo telemtetba kati marutettsü. Atangji, Naga kin lokti telongjembo katettsü, anungji yimten nüchiso akaba alinük ka nungsa külemi meliaka, anüng kübok aliba Naga nung ajak kin ka chir ama longjema alitsü asoshi lokti tentet kabosa alitsüla. Iba jagi alima balala nung, yimten balala kübok liaka Naga nung telongjem meraksai alitsü aser iba jagi Naga nung sobaliba aser yimten temeten wazüka ayuba nung maneni shilem tuluka agitsü. Aji oda, Naga yimten telemtetba ya, asenoki aginüyonga maginüyonga, sobaliba tentet nung longjemtsüba dak alaka Nagaland nung alirtem asoshi telemtetba ka, Manipur nung alir Naga nung asoshi telemtetba balaka, yamaji Arunachal aser Assam nung alir Naga nung asoshia telemtetba balaka ta, Naga nung Naga nung ajungtsü asoshi saka pei aliba alushi aser nütsüng nübo apir telemteba balala latettsüsa akümtsü. Tetzü, Naga nung lushi ajak Naga nung yimten ka kübok tangsabo melongjemtettsü aser Naga yimten nüchiso jenjanga mengutettsü. Ajisüaka, Naga nung lushi ajak nüchiso akaba Naga yimten ka kübok longjemtsü asoshi raraba nükjidadongji tatem masü, ano tarutsü lanu pututemi Naga yimten temeten aser Naga nung yimten nüchiso asoshi jembipet jembitsü aser pei putu mapang den apet inyaksü. Alima nung asenoki nüchiso akaba linük ka agi aika küma loksaa aoba nguogo aser ano nüchiso akaba linük ana asem longjemmer ka akümbaa nguogo. Iba amaji putu shia alima nung linük tejen loksaa aoba asenoki angutsü aser kintem longjemmer linük tasen akümba asenoki ajangshitsü. Aji oda, India-bo kodanga loksaa maotsü ta mali aser Naga nung lushi kodanga yimten ka kübok melongjemtettsü ta mali, item ajakji Tsüngremi dang meteta lir. Iba ama mapang tesütep ka maru tashi, tang tangbo Naga yimten tebilemstü ya Naga nung o India government na tsüngda kechi takoktsü lir aser kechisa ajak asoshi tajangzük asütsü, idakji lateta atatsüla.

## OLEMSABANG

### OJANG ANA MEYOKTEPBA AGI AKÜMBA OLONG

- T. Meren Paul, Kohima

(Yashi adok nungi...)

91. Azü-ponger - longkumer kidong nung kimang telen ka, tanur asü dang kisen sayidang azü chanu ka apong aji oda azüponger ta jempiba pa dak nungi jakzükba kimang dangji azüponger ta aja ta jembir, name of a Lungkumer phratry.
92. Azü-ra - chi suroer chiboji mimong tezülen aut aser mijang tatsük yahteter iba manungji tejem rosepdakja wangdaka ayur aser mapang apir chibo azü ar chiyonger, scrooch rice pot.
93. Azü-ra - sübosolemstü agi kangasa azü, azüra ta jembir, great look, greatly matched.
94. Azü-ra - azü dak nungi adokba, azüi anguba nungi adokba tashidak, rabies.
95. Azü-rangtsüngla - azü karh tasangbo kanga asangtsü saka nisung azü anasai arudangtasü maitmonguteter aseryakta jena aoer, dog that parks and snarls but retires without biting.
96. Azü-rosep - kecha masü nung temang nung azü rosepa akümba, anemic.
97. Azü-scü - azüi tescü atsüba, dog droppings.
98. Azü-shi - azü indang shi, azü tepseta awazüba shi, dog's meat.
99. Azü-shi - takang asü makang ta anokshidang, ayushidangba, meindang aliba mongjen shidaki ayur aroba, azüer aruba, try tilting, tilting to proper position
100. Azü-shishi - akangakanga sota mali, tashi mait, ayushishir, loose, not firm.
101. Azü-so - shiruru tepsetdang azü agizüka aon asoba, stew with animal blood.
102. Azü-tah - kilem adongtang azümejep mezüngpuba teploktsü süng mesüra au kami taren ka alenloka enokba dang azütah ta ajar, lender.
103. Azü-taji - azü tepen talang keta aliba dang azütaji ta ajar, dogs tail
104. Azü-tak - mimong nung chibo wangdaka ayuba, talem akümtsü azüdaka ayu, scrooch.
105. Azü-tasen - teinyaknü, azümasen mali, mapa inyaka dang alir, workaholic.
106. Azü-tep - tembar ajurutepdang pelatepba tamaittsü mulungsoa tepen agi temang nung azülokba, embrace each other, clasp the arm about.
107. Azü-tet-kiraka telungleni yiadoker aliba temaleni adokdaktsü, tilted out.
108. Azüdong-yong - kisü jensü dang kilem adongtang azümejep, saramejep alenloktsü yong tasazük ka ayaba, particular length of Splints to fasten roofing thatch.
109. Azü-tsüng - azü tedongzüng nung azü tasen ali temai juteta meya adokdang azü tu talakji temerang aser kanga taju adoker aser tetsüng tesa agi jajadang ai taju jagi kanga sashia atuer, iba ai dangji azütsüng ta ajar, needle like protruding young thatch plant.
110. Azü-tsüngküm - azü tenarong metsüba tsüngküm, dog mating season.
111. Azü-yah - langka meshidakba ajanga temoatsü endoka adok, takok mangu, jinx.
112. Azü-yangyang - kilem nungi yimzüka aluba tzü azüjemjem nungi yangzüka tsükba dang azüyangyang ta ajar, streams of water dripping from the edge of the roof.
113. Azü-yiar - azüyar-i kibur asü tangar ar mebendangtet anguba amah, tanur kinü-i tajung majung kecha memeteti teraksa mapa inyakba dang ajar, reference of mad dog action.
114. Azü-zü - au talak, süngdong süngsang talak mepong aondang oli aruli ta mepongi onshia enzü daktsüba, swaying back and forth in the wind.
115. Azü-zük - azük temaleni aliba ali leni sazüka azüa bener aluba, bent, tilted down

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir**

## Bangladesh nung Buddhist nungeri Tenla ki ka anaben amak



Bangladesh yimtiba, Dhaka nung aliba Arogo ka nung Khristantem tekülem sentong tembangba sülen senshidang tangokba noksa nung angur.

**August 03, 2021:** Bangladesh nung Buddhist yimsü alia amangertemi par yimsü dangi tanaben meyiptsü memelunger Khristantem amokmerena aruba sülen Tenla ki ka anaben amak, aser iba tesem nungjagi Khristantem aika jenshiogo.

Hopta aika Khristantem amokmerena aruba sülen Bangladesh nung Rangamati district kübok Suandrapara yimdak Tenla ki amak.

Buddhist yimsü alia amangertemi Khristantem dang, nenoki Tenla ki mebendokra onoki bendoktsütsü, ta amokmeren. Ajisüaka Khristan yimsü dangi meyipertemi tanaben Buddhist yimsü dangi meyiptsü memelung.

Osangbenertem den jembidang iba Arogo nungji Assistant pastor, Tubel Chakma Poran Adetion-i, "Parnoki onok dang Tenla ki bendokang ta tuyu, ajisüaka onoki yamaji meinyaktsü," ta metetdaksü.

"Onoki taküm tenla agtsütsü-a melunga lir. Parnoki onok dang akhi yimsü dangi tanaben meyipang ta tuyur, saka onoki memeyiptsü. Yisu Khrista ya ozü Kümtetdakba aser onoki Pa atema asütsü melunga lir," ta assistant pastor-isa metetdaksü.

Pastor-i ashiba agi, iba Arogo nung züngsemtemji tamalenbo Buddhist yimsü amangertem liasü, ajisüaka 2005 küm parnoki Khristan yimsü agizüka liasü.

Suandrapara yimdak Khristantemi taküm January ita nungi tenzüka lungru aser injung amshia Tenla kiji süzüka liasü.

Bangladesh Bawm Tribal Baptist Arogoi tenla agütsüba ajanga parnoki Tenla kiji asü.

Pastor-i ashiba agi, linük nung nütsüng aika aliba-Buddhist nungeri Khristantem kanga amokmerener, saka iba Arogo nung Khristantem anogo shia longjema

sarasademer; Arogo dak sendakba maparen ajak anentsü aser tanaben Buddhist yimsü dangi meyiptsü atema Khristantem nem anogo tenet züngzükja liasü.

Yimtenren party- United People's Democratic Front (UPDF) nung lenir, Joan Chakma leniba nung Buddhist yimsü alia amangertemi July 15 nü iba Arogo Tenla kiji amakba mapang nung Tenla ki kikümbang, Kangki aser osettsüset aika raksaja liasü.

Iba sülen anogo tenet dang lir July 22 nüa kasa telok jagisa Tenla ki jara, kishi aser injung agi yangluba kilem ajak raksatsü.

Tenla ki amakba osangji osangbenertem mesüra police nem metetdaksüra nenoki iba dang nungi ano tamajungba ajurutsü, ta Khristantem amokmerena liasü.

Khristantemi tesünep nung linüba agi Tenla ki amakba osangji police nem memetdaksü, ta shia pastor-i, "Linük nung onok ya minority lir, aser Buddhist nungeri onok anema kechi inyaktsüar onoki memetet. Onoki parnok den ken o jembiba ajanga yimjung yangluner," ta metetdaksü.

Osangbenertem den jembidang Bangladesh Baptist Church Fellowship (BBCF) general secretary, Rev. Leor P. Sarker-i, Ranfamati nung Arogo züngsemtem atema onoki shisabulutsür, ta ashi.

"Onoki Khristan züngsemtem atema shisabulutsür. Parnok 50 shi tetsübu nung dang alir, aser lendong nung jenbutsu atema parnok aikati ki toktsür jenogo," ta pai metetdaksü.

Alima nung Khristantem reshikangshiba linük 50 rongnung Bangladesh ya jenjang 31buba nung lir (Open Doors USA 2021 World Watch List).

Bangladesh nung Khristantem aikati tetsübu nung house churches nung miima tekülem sentong agia

arudar. Bengladesh nung Buddhist yimsü amangertemi Khristantem anema inyakba dang masü saka Muslim yimsü alia amangertem ket nunga Khristantemi reshikangshi ajurur.

Coronavirus wara mapang nung sorkari bendangshidanga Khristantem nembo teyari balala magütsüba ajanga Khristantem aika kanga timtemogo.

Bangladesh nung nütsüng million 170 jungnüa lir, ajisüaka iba linük nung Khristan nütsüngbo shilem 1 den tajemba lir.

## Ireland nung Arogo aser sorkar na tsüngda mangatettep adok

**Dublin, August 03 (Agencies):** Coronavirus wara anema tenokdangba balala nung ajemdaker Ireland nung Arogo aser sorkar na tsüngda mangatettep adokogo; Ireland nung Arogo 22 nungi putir pongui Arogotem dang tan ita coronavirus tenokdangba alema Tenla kidang lokti tekülem sentong agiang, ta metetdaksü.

Iba sülen sorkari Arogo lenirtem aitsüba den külemi tenokdangba magien tashi lokti tekülem sentong magii alitsüla, ta metetdaksü.

## Alima nung Khristantem tepsetba shilem 60 agi timba kümogo

**August 03, 2021:** Küm shia alima tesem balala nung Khristantem tepsetba aser Khristantem anema inyakba tatalokbatem timba akümer; yamaji yaküm-a alima nung Khristantem tepsetba shilem 60 agi timba aküm, ta Open Doors USA-i metetdaksü.

Open Doors' 2021 report ajanga ashiba agi, 2020 küm alima nung Khristantem reshikangshiba tongti kuli ana liasü; 2020 küm Khristantem tepsetba shilem 60 agi timba aküm, aser ibaji talisa Nigeria nung Islamic telok balalai Khristantem anema inyakba ajanga liasü aser tanabuba nung alima nung Khristan anemba

## ANOGO ABEN TSÜNGREM DEN

### Shisatsü Magizükba Lendong

"Tashi temeteti yimtung nung ayimtener; Watidak lai ola adoker. Mazüangi aliba lenmang nung lai ayimtener; yimti süngkhümbong züngdang lai la otem jembir... kechiyong parnoki shisatsü sempa, aser Kibuba tsübuba meshim" A shin 1:20-21,29

Tsüngrem shisatsüji kar nem dang masü saka ajak nem asütsütsü atema ayimtener, saka aji ajakjibo aginüa memeshir mesüra magizüker. Tongmelenger, suwartem, sensamasatsütem, (v22) "shingaia kü nembo shisatsü melemzüktsü" ta mashitsüsa ajak ayimjema jaa arur saka ajakibo memeshir mesüra magizüker. kari mangashi amai toktsür, kari angashir sürnung magili ta asür, kari aji haota mali (V24-25)

Meimchir anogoshia pei mulungba shimtsü asoshi maongka balala angur. Aseni kechi shimer iba jagi asen ajungtsü saka, tamakok alutsü saka anir. shiri Tsüngremer shisatsü sentoker, pei tangatetba asertebilemba nung sang telemtetbaji agir, pai iba süngjangji achitsü. Arishi songtema amajok nung pei anibelemba dang asütsü kechiyong, pei sasa inyaktetba, bendenba, rizüngba rongsen asüyonga, konang asüyonga ajakji tazüngla dang küma aotoktsü t alai o jagi ashir (v31-32)

tanü asenoki aji angateta, tajabaji angashia Tsüngrem shisatsüji ang agidi ta sürabang asenok asoshi tekümzükba angutsü maongka bener arütsü. "saka shibaisa kü dang angadir kümzüka alitsü..." (v33) Asenoki aji angashir südito?

#### SARSADEM:

Kibuba, ni suwar, tamashi aser sensamasaba menden nung shia a makai memenli. Nai kü nem shisatsü kuama. Amen

Ireland nung tang agi tasembenbuba linük shibanga lir aser August ita tatembanglen nungi ang tenokdangbatem tanem-tanemi agientsü tebilemba lir.

Coronavirus delta variant proktsüa akok, ta tsübua sorkari maneni linük nung tenokdangba balala magiener.

Taküm May ita nungi tenzüka Tenla kidang lokti adenshia tekülem sentong agia liasü saka wara maneni prokba sülen ano shibang. Tan hopta nungi tenzüka Tenla kidang

Baptiba sentongtembo agitsü melaogo, ajisüaka lokti tekülem sentong agitsü memelar.

Ato kilonser, Micheál Martin aser Health Minister Stephen Donnelly napronglai, Arogotemi ketdangsertem tetuyuba alema inyakba ajanga nüburtem taküm lendongi yoktsü, ta shiogo.

Ireland nung Association of Catholic Priests-ia Arogo lenirtem aija, putirtemi lokti tekülem sentong agitsü tuyuba ajanga wara proktsü aser vaccine magirtem lendongi yoktsü, ta shiogo.

4,761 tepsetogo; tetezü yaküm alima nung Khristantem tepsetba tesadang ka shibo Nigeria kija nung tepsetba liasü.

Alima tesem balala nung coronavirus tashidak anema tenokdangbatem lia linük aika nung Khristantem mapa makai aküm, iba denji külemi sorkartemia Khristantem nem teyari magütsü. Coronavirus ajanga Khristanterm aika timtemogo, aser ibaji reshikangshi den kasa, ta pai ashi.

"Alima nung reshikangshi ajurur timbaji Khristantem lir, kechiyong linük aika nung Khristan nütsüng kanga ajema lir," ta paisa shisem.

**OLONG PAITEP # 5895**

1			2		3		4		5	
6		7								
					8					
9			10							
						11				
			12							13
	14							15		
					16					
			17							
								18		
19										

- |   |  |                                      |  |
|---|--|--------------------------------------|--|
| <b>TIPILEN</b>  |  | <b>LANGTSÜNGLEN</b>                  |  |
| 2. Teburtemi tejak nung awaba - (8)                         |  | 1. Temejangdak - (6)                 |  |
| 6. T _ _ _ em - (3)   |  | 3. Nisung ka mapa inyaksü nübo - (4) |  |
| 8. Tzük ayudak - (3)  |  | 4. Azüntsü asoshi mejemba - (6)      |  |
| 9. Nüngdakba dang timba - (6)                               |  | 5. Tesangwa agütsüba - (5)           |  |
| 11. Züina ao - (4)  |  | 7. Tila masü - (4)                   |  |
| 12. Yangi tzü angur - (5)                                   |  | 10. Tebenjem tetsür chanu - (4)      |  |
| 14. Tangar dang nungi tali - (4)                            |  | 11. Tekolak nung inok - (4)          |  |
| 16. Senyong masü - (6)                                      |  | 12. Tetsüngda - (6)                  |  |
| 17. Oadokdi - (3)   |  | 13. Tangar inyakba ka inyak - (6)    |  |
| 18. Tzü tarok - (3)   |  | 14. Tim masü ta ashi - (5)           |  |
| 19. Yimtaklir aikati iba ya ki den külemi yanglusemer - (8) |  | 15. Asalendong - (4)                 |  |
|   |  | 16. Tanü dangtsü - (4)               |  |

**OLONG PAITEP # 5894 TELANGZÜBA**

- |                                       |                                      |
|---------------------------------------|--------------------------------------|
| <b>TIPILEN :</b>                      | <b>LANGTSÜNGLEN :</b>                |
| 1. Telok, 4. Aluru, 6. Ozüng, 8. Emk, | 1. Tenükjang, 2. Luden, 3. Kiochtsü, |
| 9. Kin, 10. Teti, 12. Süir, 13. Jen,  | 5. Lenti, 7. Tajangzük, 11. Teronem, |
| 14. Ola, 16. Talak, 17. Mazük.        | 12. Sempa, 13. Jahaz.                |



**ALOKBA-I LIGHT BILL TESADANG DANG AGÜTSÜ**

**Alokba** : Hai...Bill Assistant...Haang tan ita indang ozü light Bill ya agizükang.

**B/Asstt.** : Arrreee...Bill 1000/- adok sernung kechiba 500/- dang agütsür...!!!??? Kodaser Bill tesa dang dang agütsür...??? Ya-bo ni magizük-ja...Nenok light bill kodanga mapang shitak nung magütsür...Aser-bo ano karibo light auya-a atsüker...nenok dang ya auer ta ajatsü dalang adi.

**Alokba** : Eeeesssh...Kodaser magizüksüba...!!! Nenoki tan ita tepiyong nung anogo-15 nu (ita tesa dang) dang light yok...Anungji nia Bill tesa dang dang agütsür adi...Light-bo ita tesa dang (anogo-15) dang yoktsüba... Saka Bill-bo ita tepiyong indang meshitsüba...!!! Aser light bill kodanga mapang shitak nung magütsür... Nenok dangang rakzük raktemer ajatsü dalang adi...Anungji tang nungi Light bill shitak aginura anogo kata miss masü light yokang... Aser bill mapang shitak-shitak nung agüjang nooo.

- Lilir : L.Kika Pongener

**TANÜBO NAI LANGZÜANG**

Q. Global Tiger Day ya \_\_\_\_\_ nung amunger.  
 A. July 28      B. July 29      C. August 1      D. August 2

===== (Taruba adok nung onoki langzüksü) =====

**YASHI ADOK TELANGZÜBA : Kerala**

**AO OSHI ANGAZÜKDAK:**

**TANÜ ANGAZÜKTSÜBA OJANG**



**Kiriki**  
 (n) ki tip nung tesangwa aser mopong arudaktsütsü lapokba (window)  
 \* Ki tip ajaklen **kiriki** lia yanglutsüla.

**Kiriri**  
 (v) tetsür washiba ola ( victory cry of women).  
 \* Watsütemi takok ken tener külen **kiriri** ta washia ola agütsü.

**NAI-A YA METETTER MA?**

**NETFLIX SABANG NUNG SAYÜTSÜ ALIBA SERIES ASER MOVIE KAR: 'AUGUST 2021'**

- Cocaine Cowboys: The Kings of Miami - Netflix Documentary
- Control Z: Season 2 - Netflix Series
- Car Masters: Rust to Riches: Season 3 - Netflix Series
- Hit & Run - Netflix Series
- Navarasa - Netflix Series
- The Swarm - Netflix Film
- Vivo - Netflix Film
- SHAMAN KING - Netflix Anime
- UNTOLD - Netflix Documentary
- Bake Squad - Netflix Series
- The Kissing Booth 3 - Netflix Film
- Monster Hunter: Legends of the Guild - Netflix Anime
- Fast & Furious Spy Racers: Season 5: South Pacific - Netflix Family
- Gone for Good - Netflix Series
- The Kingdom - Netflix Series
- Valeria: Season 2 - Netflix Series
- UNTOLD: Deal with the Devil - Netflix Documentary
- The Defeated - Netflix Series
- Memories of a Murderer: The Nilsen Tapes - Netflix Documentary
- Out of my league - Netflix Film
- The Witcher: Nightmare of the Wolf - Netflix Anime
- John of God: The Crimes of a Spiritual Healer - Netflix Documentary
- Motel Makeover - Netflix Series
- The November Man
- The Old Ways
- EDENS ZERO - Netflix Anime
- Family Reunion: Part 4 - Netflix Family
- He's All That - Netflix Film
- I Heart Arlo - Netflix Family
- Titledown High - Netflix Series
- Sparking Joy - Netflix Series
- UNTOLD: Crime and Penalties - Netflix Documentary

**SUDOKU # 5935**

**TELANGZÜBA # 5934**

	5			9			2			8	3	9	7	4	1	2	5	6
		1			2	4				7	4	6	9	2	5	3	1	8
4			6		7	5	8			2	5	1	8	3	6	7	9	4
7	1		8			6	4			1	7	5	4	6	8	9	3	2
								5		4	9	2	5	1	3	6	8	7
	4					2	3	1		3	6	8	2	7	9	1	4	5
8			2			9	6	4		9	2	3	6	5	4	8	7	1
		4		8			5	2		5	1	7	3	8	2	4	6	9
		2		5		7				6	8	4	1	9	7	5	2	3

**OJANG LUTEP # 5480**

- ÜMDAMEKNGI :
- KBAINYA :
- NGAJAA :
- UTSTARÜ :
- NGNU :
- TEMTIM :
- RUTSAJUÜSA :
- IPE :
- ASSA :
- ATTETONGER :

**OJANG LUTEP TELANGZÜBA # 5479**

**ASENI OCHISHIA ASER MULUNGSOA TENLA AGÜTSÜRA TSÜNGREMI TEMOATSÜ LENMANG LAPOKTSÜR**

**TAN HOPTA ATEMA - KOMA SÜLA ?**

Q. Mizoram aser Assam arrtsülen atalokba ama Nagaland aser Assam Police na ta arrtsü raktepa khatap nunga koma süla?



Ato Kilonser Narendra Modi den Defence Minister Rajnath Singh aser Home Minister Amit Shah nunger BJP Parliamentary Party senden nung adeni aruba mapang tangokba noksa nung angur.

### Angati ration agütsüba ajanga sensakertem nem teyari tulu agütsüdar: Modi

**New Delhi, Luroi/August 3 (Agencies):** Ato Kilonser Narendra Modi-i Mongolbarnü, coronavirus wara pokteter aliba mapang lisopurtem nem teyari agütsütsü atema sorkari takokba tashi inyakdar, ta ashi.

Gujarat nung Pradhan Mantri Garib Kalyan Anna Yojana (PM-GKAY) beneficiaries tem den video conferencing ajanga sensaksemba mapang Modi-i, iba scheme kübok kibong lakh aika nem angati ration agüja arudar aser iba ajanga wara pokteter aliba mapang sensakertem shisabulu tajemba kümdaktsüogo, ta ashi. "Ner kibong ration tebilemstü bentetba atema ni temulung asür," ta pai beneficiary ka dang ashi.

PM office sangdong ka ajanga, iba scheme dak sendakba nung tangazükba agütsütsü atema Gujarat nung nüburtem nem shilem agidaktsütsü asoshi sentong

ayongzüka agidar, ta ashi.

PM-isa, linük nüjiso anguba sülen sorkar timba kati jenjang dalang agi sensakertem nem chiyongtsütsü agütsütsü jemba aruogo, ta ashi. "Ration schemes dalang aser budget taküm timba kümogo saka tatakzük ka dang lir. Chiyongtsü rizüngdak timba akümer saka yatzüra aser malnutrition tajemba makümer," ta Modi-i ashi. Iba sentong takok manguba ya oset lemshitsü atema inyakym tapet ka maliba ajanga lir, ta pai ashi.

Iba jenjang melenshitsü atema 2014 küm mapa tenzükshi. Beneficiary taila crore aika iba inyakym nungi aginogo. Ration card den Aadhaar sendaktepdaktsü aser sorkar ration dokantem nung digital technology inyakym benok," ta pai ashiba den scheme tasenba ya wara pokteter aliba mapang shinga tepok tazüng amoa modaktsütsü nükjidong nung

benok, ta ashi.

"Tanübo wheat (seret ka nung sen 2) aser jang (seret nung sen 3) agüja aliba den bendenloksema beneficiary ajak nem wheat aser jang seret pongungu angati agütsüdar. Iba scheme ya Diwali tashi benoktsü. Gujarat nung iba scheme ajanga nisung crore 3.5 shi ajangzükdar," ta Modi-i ashi.

Modi-i ashiba agi, sensakertem ajungkettsüji sorkar mapa tongtibangtiba lir. "Tanü linük nung infrastructure atema sen crore aika intokdar, saka kasaji nüburtem libaliro jenjang ajungkettsü atema inyakdar," ta pai ashi.

PM-GKAY ya food security welfare scheme ka lir koba Covid-19 wara ajanga tetsükdaktsü adoker aliba mapang teyari agütsütsü atema PM-i benokba lir.

Yojana kübok National Food Security Act-i ayimjema aliba beneficiaries ajak nem jang seret pongungu talila agütsür.

### Oxygen plants amenoktsü atema Delhi sorkari teyari agütsütsü

**New Delhi, Luroi/August 3 (Agencies):** Coronavirus wara wave tasembuba atema renemshia atatsü atema Delhi Chief Minister Arvind Kejriwal-i Mongolbarnü, oxygen production plants aser storage facility tem amenoktsü asoshi private sector nem teyari agütsütsü inyakym ka agizükogo.

"Medical Oxy Prodn Promotion Policy agizükogo. Iba ajanga oxygen production plant amenoktsü, Oxygen tanker tem atema sen intoktsü aser oxygen rizünga ayudak amenoktsü atema pvt sector tem nem teyari balala agütsütsü. Iba ajanga Delhi nung oxygen agi manüngtsü, kong taoba mapang timtem tulu

ajangshiogo," ta Kejriwal-i tweet asü.

April aser May ita Delhi nung oxygen agi kanga anüng aser linük yimtiba nung mozükitemi ketdangsurtem dang teyari meshia liasü. Jurila healthcare facility temia sorkar dang shirangertem anintsü mepshia liasü.

(Maneni tapak 10 nung...)



New Delhi kübok Constitution Club nung opposition lenirtem den senden amenba sülen totzü nung jenjang ajungketba anema Congress lenir Rahul Gandhi-i bicycle ka anir Parliament-i aoba noksa nung angur.

### Congress aser Opposition party 14 lenirtem ajurutep

**New Delhi, Luroi/August 3 (Agencies):** Congress aser opposition party lenir 14-i Pegasus ken o nung parnok tamendakdak nungi masetshitsü aser Parliament Monsoon Session tanungba nunga maneni longkak aitsü bangjemogo, ta lenir anati HT dang ashi.

Congress lenir Rahul Gandhi-i, Pegasus, aluyimba ozüng aser totzü jenjang ajungketba amala ken o balala sensak asemstü atema opposition lenirtem Mongolbar anepdang jaok. "Onoki iba ken o nung onok tamendakdak nungi masetshitsü telemtetba agiogo. Sorkari iba session maneni agiyonga onüra Pegasus ken o nung sensak asemstü atema mulunga agizüktsüla," ta Opposition lenir kati ashi.

Mongolbar anepdang senden ya ghonda ka dak tema agi aser Gandhi-i, Opposition party tem India shilem 60 tenüng nung

nokdaker aser maneni longjemmer raratsü ta ashi.

Iba senden nung Congress lenirtem, Dravida Munnetra Kazhagam, Nationalist Congress Party, Shiv Sena, Rashtriya Janata Dal, Samajwadi Party, Communist Party of India (Marxist), Communist Party of India, Indian Union Muslim League, Revolutionary Socialist Party, Kerala Congress (M), Jharkhand Mukti Morcha, National Conference, Trinamool Congress aser Loktantrik Janata Dal nungi lenirtem dena liasü. Aam Aadmi Party aser Akali Dal na sendeni mejaok.

Party temi tasa tasen benoka anogoshia longkak aittsü telemtetba agi. "House nung Pegasus ken o benoka sensak mesemra Parliament inyaksangshi mesütetsü," ta tanga lenir kati ashi.

(Maneni tapak 10 nung...)



COVID-19 wara süshia aoba sülen Baramullah district kübok Tangmarg tesem nung smartphones aser internet facilities maturtem atema kima nung class ayongzüka agiba mapang govt middle school kaketshirtemi shilem agiba noksa nung angur. Ketdangsurtemi Jammu and Kashmir nung tetuyuba tasen ka magütsü tashi coaching centre tem densema school aser higher educational institution ajak shibanga atatsü tetuyuba agütsüogo.

### J&K Police-i kiralongrar list ka sangdongogo

**New Delhi, Luroi/August 3 (Agencies):** Jammu and Kashmir Police-i kiralongrara 10 sangdongogo. Iba list ya Kashmir Zone Police-i Hombar aonung Twitter nung post sütsü. Iba list nung kiralongrar tejen tenet aser kiralongrara tasen asem densema lir.

"Top 10 #targets: #tejen #kiralongrar- Salim Parray, Yousuf Kantroo, Abbas Sheikh, Reyaz Shetergund, Farooq Nali, Zubair Wani & Ashraf Molvi. #tasen #kiralongrar- Saqib Manzoor, Umer Mustaq Khandey & Wakeel Shah," ta Kashmir Zone Police-i tweet asü.

March ita police-i iba amala mesükba list ka sangdong aser kiralongrartem indang osang agütsürtem nem senpet agütsütsü nangzük.

March 13 nü Jammu and Kashmir Police-i Twitter ajanga kiralongrartem indang noksa den parnok indang tenüng dena lemsatapa liasü.

Kasa mapang nung Mongolbarnü Bandipora kübok Chhandaji tesem nung

kiralongrar Babar Ali tepsetogo, ta police-i ashi.

"July 23/24 nü Shokbaba temeket nung arem meita aoba mapang kiralongrar asem tepset kong Pakistan nunger kiralongrar ka densema liasü. Kiralongrar ka arem nungi jena ao aser pa maneni bushia aruogo," ta Director General of Police (DGP), Jammu and Kashmir, Dilbagh Singh-i ashi.

"Yasüng pa Chhandaji yimtsüng nung anenzüka aliba osang angazük aser iba sülen Chhandaji yimtsüng meita aoba mapang Pakistan nunger kiralongrar Babar Ali tepsetogo," ta DGP-i ashi.

July ita Jammu and Kashmir kübok Bandipora tesem nung tepsetba kiralongrartem ya Pakistan nung amendaker aliba Lashkar-e-Taiba (LeT) züngsemtem liasü.

July 16 nü police-i ashiba agi, parnoki taküm January ita nungi tenzük tang tashi nung Kashmir nung kiralongrar 78 tepsetogo, kong tongtibang lenirtem densema liasü.

## Pakistan nung COVID mechi yimti tulutem alener



Islamabad, Luroi/August 03 : Pakistan indang Punjab Province kübok Rawalpindi nung August 02, 2021 nü nüburtet face masks agir senzüba noksa nung angur. Deobarnü Pakistan nung nisung 4,858 dak COVID-19 putet, ta National Command and Operation Center (NCOC) ajanga Hombarnü ashi. Tang tashinung linük nung coronavirus agi nisung 1,039,695 menepa lir aser item rongnungi nisung 943,020 taneptsü nguogo, ta NCOC ajanga ashi.

**Islamabad, Luroi/August 03 (Agencies):** Pakistan nung coronavirus tekeraba nung menatepa aoba tabu, Delta variant ajanga iba tashidak wara wave pezübuba tenzükba mapang Hombarnü yimti aika nung iba tashidak azüoktsü mechi tenokdangba tanaben agütsüshio.

COVID-19 cases tasen 4,858 puteta linük nung iba tashidak agi menepa nisung 1,039,695 akumba sülen linük nung COVID-19 tashidak ketdangsuba tentet, National Command and Operation Centre (NCOC) ajanga yimti aika nung benoka aliba guidelines tem tanaben reprangshia liasü.

Totuyuba tem tanaben yanglushir sangdongba mapang, iba tashidak - tang kanga kera menashia otetba Delta variant tali lir - prokshia aoba azüoktsü

asoshi nükjidong ka yur sorkari telemtetba agi, ta NCOC tekolakba aser Minister for Planning, Asad Umar-i ashi.

NCOC senden amenba sülen, "Linük tesem ajungalen cases tasen aser positivity ratio renlokogo, anungji mera tasen agütsüsa akum," ta Umar-i ashi.

Tang totuyuba tasen agütsüba kübok shishilempaba tesemtem aonung 8:00 ako nung shibangtsü, koba 10:00 ako nung shibanga liasü, aser kidang nungi mapa inyaker shilem 50 asütsü tanaben benok aser public transport nung shilem 50 tashi amentsü atema sorkari telemtetba agi.

Ano maneni sorkari hotel aser restaurant kilung nung chiyongba nokdang aser kima nung chiyongba aonung 10:00 ako tashi melar aser ki tonga bener otsüba mesüra meshia bener aotsü melar.

Iba tenokdangba tasen ya August 3, 2021 nungi tenzüka August 31, 2021 tashi Lahore, Rawalpindi, Islamabad, Muzaffarabad, Mirpur, Faisalabad, Multan, Abbottabad, Peshawar, Karachi, Hyderabad, Gilgit aser Skardu yimtittem nung amshia aotsü.

Transport mapa inyaker, dokan kibur, banker, NADRA nung inyaker densema service sector nung inyaker mesüra nisung aila den inyaksüsa aliba nisungtem ajak August 31, 2021 tashinung COVID-19 anema mozü agir alitsüla, ta Umar-i ashi.

Kaketshirtem arishi küm 18 nungi tema alirtem danga August 31, 2021 tashinung mozü agütsü shio, ta pai ashi.

Tenokdangba ya July ita sala liasü, saka iba yongji cases tasen jenti akum.

## Ethiopia aser Sudan tsüngta ayong nung nisung tasü mang aika ngutet

**Humera, Luroi/August 03 (Agencies):** Ethiopia north tsütsü Tigray region nung aaliba ayong ka nung Sudan tsütsü ayongkum len nisung tasü mang 30 pongteta adoka liasü, ta Ethiopia refugee ana aser Sudan nung tenük kuli alir pezüi Hombarnü osangbener dang ashi.

Item tasü mang ya Setit ayong nung angu, koba dang Ethiopia nungeri Tekeze ta ajar. Iba ayong ya Eritrea den Ethiopia arrtsü nung lir aser Sudan nung yimoker, kong linük asem ya ajurutepa lir.

Ethiopia arrtsülen aliba Humera jila nungi jena aosang surgeon, Dr Tewodros Tefera-i osangbener dang ashiba agi, pai tesüba anogo trok tsüngta Sudan nung nisung tasü mang ter remogo aser ano yangji aliba angopur aser refugee temia nisung tasü mang 28 nguteta lir ta ashi, aser item rongnung tenet Hombarnü ngutet.

"Parnok teku, tebok, tetsüng nung injang agi khar aser parnok teka alener liasü. Refugee tem teyari ajanga nisung tasü mang asem jangjatet aser parnok ya Humera nungi Tigray nung liasü," ta pai ashi.

Rara tenzükba mapang Tigray nung aika Humera nungi Sudan-i jena ao.

Pai osangbener dang video ana sayuba nung nisungtemi tasü mang ka atema leper toba aser iba leper nung nisung tasü mang ka inoka aliba angu.

Humera nungi Ethiopian refugee katia nisung tasü mang tuko ngutet, ta ashi.

"Onoki nisung tasü mang tuko ngutet... Parnok lisü agi

alener aser temang waker liasü, saka parnok temang nung tarak meliasü," ta pai ashi.

Ayongkum nung nisung tasü mang waker yua aliba noksatem pai sayu.

Ayong nung nisung tasü mang ngutetba indang social media nung prokshiba ya Tigrayan "propagandists" temi taila campaign agiba ajanga lir, ta Ethiopia sorkari amshiba Twitter nung Hombarnü shia liasü.

Saka Ethiopia refugee temi ajangshiba ya Sudan nung tenük kuli alirtemi ashiba den puteper.

Kassala state kübok Setit tzünokdang anasa aliba Wadd al-Hilew jila nung alir Sudan nung ana aser ketdangsur anati Setit ayong nungi nisung tasü mang 20 shi ngutetogo, aser itemji Hombarnü pongu, Deobarnü tuko aser Honibarnü trok ngutet, ta ashi.

Tasü mang kar nung injang agi kar liasü, kar teka alener saka yiruba majitet, ta par pezüi osangbener dang ashi. Iba yimtsüng ya Sudan nung Hamdayet camp nungi kilometer 42 shi pilar lir, kong Ethiopia refugee temia nisung tasü mang nguteta liasü.

Ethiopia indang central sorkar aser Tigray indang ruling party, Tigray People's Liberation Front tsüngta ita ti tejakdang rara tenzüka liasü. Central sorkar den sendaktepa aliba Amhara sepaitemi nisung tasü mang ya iba ayong nungya inoktsür, ta Tigray nüburtet taoba mapang tai tonglokja aru.

Tigray nung raraba ya tangbo Amhara aser Afar region tashi prokshia aor, koba Tigray anasa lir.

## Voting inyakyim aitsüba atema Bolsonaro bushisü ngdangtsü

**Brasilia, Luroi/August 03 (Agencies):** Brazil indang Superior Electoral Court-i Hombarnü sangdong ka ajanga, far-right tir Jair Bolsonaro-i, tamendakdak makai linük nung electronic voting system maneni aitsüba bushisü ngdangtsü, ta metetdaksüogo.

Linük nung electoral body tekolakbaisa, taoba Brehostibarnü Facebook Live sentong ka nung tir-i osang teyazü prokshiba indang bushisü ngdangtsü atema Supreme Federal Court dang asü ngdangtsü mulungtepogo. Iba sentong nung Bolsonaro-i ghonda ana dak tema jembi, kong pai taoba tir election ana nung ochi mashi inyakyim lir ta jangja aliba indang jembiba den 2018 küm election mezü ngbuba round pai koker lila ta ashi.

Electoral Court-i bushisü ngdangba sülen Bolsonaro-i, economic aser political tashi mashi yim agi

amshi asü masü, media mashi yim i amshiba, ochi mashi inyakyim, kelak-kü bong inyakyim, electronic voting system aitsüba aser 2022 general elections legitimacy dak sendakba nung aibelena ali mali aji jangjatsü.

Bolsonaro-i, electronic voting inyakyim ya mapang talangka aija arudar, koba Brazil nung 1996 küm benok. Pai electronic voting system melena 2022 tir election nungi tenzüka paper ballots amshiba inyakyim benokdaksüner, koba print süa amshitetsü aser asadangtetsü.

Brazil nung aliba nüburtetmi voting station tem nung parnok indang ballots electronically agütsür, aser Bolsonaro-i küm aika vote agütsüba shia paper printout kaka asütsü khanga arudar aser ashiba agi, paper trail maliba ajanga ashio ktsütsü temelaba kümdaktsür.

Pai election inyakyim nung

ochi mashi ken o sendaka aliba indang kuli tejangja kecha magütsü aser Superior Electoral Court iba inyakyim nung ochi mashi kecha sendaka mali aser tetsükdaktsü kecha adoka mali, ta shia arudar.

Deobarnü Sao Paulo, Rio de Janeiro aser Brasilia densema Brazil kübok yimti balala nung Brazil nungertemi Bolsonaro pusema electronic voting inyakyim anema yimti yim tongtem nung longkak aitogo.

Arishi küm 66 tain lenir shiba lenla balala nung aija arudar, pa iba longkak aitba sentong nung shilem magi.

Pa tang Brazil nung coronavirus wara achayangba dak sendakba nung Bushisü ngdang ka kübok lir. Iba tashidak ajanga Brazil nung million tesadang ka süogo aser pa jenjang mejungi kümogo.

Hopta asem tejakdang Bolsonaro-i, 2022 elections

agitetsü magitetsü mejangja ta ashiba ajanga mepetmesü tulu adokdaksü.

"Brazil nung election jung junga agütsü, ajita mesera election magütsü," ta pai ashi.

Iba den bendenloksema Bolsonaro-i, Superior Electoral Court tir Luis Roberto Barroso-i paper ballot amshiba inyakyim benokba ajanga vote agütsüba aser agütsürtem anisa tenzüksü ta ashiba ya shisatsü agi matonga ajanga lir ta ashi sülen taitsüba aika ajangshio.

Ken o asadangertemi ashiba agi, Bolsonaro-i vote agütsüba yimya kanga mejungi aitsüba ajanga, pa taruba küm election nung tamakok angutsü atema renemshiba sayur aser taoba US tir Donald Trump ama election nung tamakok anguba sülen meyiper telanzüba ka agütsütsü asoshi teyazü takhangba balala agütsütsü atema renemshir asütsü akok. Bolsonaro-i taoba US tir

Donald Trump ya kanga sakloka liasü.

Hombarnü Barroso aser 1988 küm linük temzü ng ozü ng yanglushiba sülen court tir mapa bendanger alirtem ajaki kuli kaket ka nung sign sütepingo. Iba kuli kaket nung electronic voting system dak sendakba nung kecha tetsükdaktsü madoktsü ta tenangzükba ka agütsüogo.

Kasa mapang nung alima linük tem rongnung Brazil-a coronavirus tashidak agi kanga mejungi kongshir lir. Brazil nung tang tashi nung covid tashidak nisung 19,953,501 dak potetogo aser nisung 557,359 süogo.

Coronavirus tashidak agi linük kanga mejungi kongshir liaka tashidak nokdangtsü atema jenjang tapet magiba aser vaccine agütsüba inyakyim shidak benoka minyakba atema tir Bolsonaro lenla aika nungi aija arudar.

## Peren nung Aug. 18 tashi lockdown atsülanger

**Peren, Luroi/August 03, 2021 (TYO):** Mongolbarnü, Deputy Commissioner & Chairman DTF, Peren, Sentiwapang Aier, NCS-i sangdong ka ajanga, district nung August 18, 2021 tashi maneni lockdown atsülanger aser nokdangba/melaba tetuyubatem nung maneni anidakba den teküboklen agüja aliba ama maparen/inakyim kar salatsür, ta metetdaksü.

1. Osettsüset ayokba dokantem/shishilembaba tesem ajak anepdang 6:00 AM nungi

### Noklak DTF

#### senden menogo

**Noklak, Luroi/August 03, 2021 (TYO):** Mongolbarnü, DC Conference Hall, Noklak nung, Deputy Commissioner, Hiazu Meru-i anir Noklak District Task Force on COVID-19 senden agiogo, ta sangdong ajanga metetdaksü.

Iba senden nung, DC-i 'COVID-19 unlock-4 phase' indang SOPs tasentem telok dang rasa ashi. Pai telok dang, teti tejak nembangba mask inoktsü, Covid-19 temzüng nung anidaktsü, vaccination aser Covid-19 wara dak sendakba tekkümdangtsü tem metetdaksü.

Tang ama tensa tamajungdang, iba wara nungi nüburtem kümzüka ayutsü asoshi, timtem arema maneni meranga inyaktüsü asoshi Meru-i district task force züngsemtem ajungshia liasü.

Iba senden agiba mapang, District Task Force züngsemtemi district nung Covid-19 tensa dak sendakba nung maparen renemshibatam asadangshia aser olemtepa liasü. Iba den külemi, Noklak district nung COVID-19 awareness campaign maneni achaayanga agitsü asoshi züngsemtem bangjemtep, ta kasa sangdong nung shia lir.

## CHANGTONGYA KAKETSHIR TELONGJEM

### Raffle Draw Result

Date: 3rd August 2021

1st Prize : Sl. No. 505

2nd Prize : Sl. No. 234

Consolation Prize :

- Sl. No. 1092
- Sl. No. 46
- Sl. No. 748
- Sl. No. 490
- Sl. No. 1607
- Sl. No. 1482
- Sl. No. 1846
- Sl. No. 809
- Sl. No. 1137
- Sl. No. 1527

#### Note:

- The winners should claim their winning prizes within 15 days from the date of draw.
- Winners must produce the original ticket while claiming the prize.

## JOB VACANCY

(MOKOKCHUNG)

ONE MALE ONE FEMALE

Contact : 9863161670

7085444880

aonung 6:00 PM ako tashi lapoktsü melar.

2. Aonung curfew mapang ajemtsür aser aonung 8:00 PM ako nungi anepdang 4:00 AM tashi curfew alitsü.

3. Curfew mapang - 8:00 PM nungi 4:00 AM ako tashi nokdangba dak alaka, Takeaways, home delivery outlet tem lapoka aser maparen achaayangtsü asoshi melar.

4. Bus nung passenger shilem 50% shi dang mener senzüsönbongtsü asoshi melar aser driver den tamener ajak COVID-19 vaccine dose anaprongla mesüra mezüng COVID-19 dose agir alitsüla. Iba den külemi, mezüng dose agir anogo 15 sülen ang bus nung senzüsönbongtsüla. Ajita masü yongjia, driver/attendant temi RT-PCR/TrueNat mesüra

CBNAAT ajanga agiba COVID-19 negative test report sayutsüla.

5. Tekalen agüja aliba inyakyim nung anidaka, Inter district bus service/taxi service melatsü aser iba den bendenloksema passenger ajak COVID-19 dose anaprongla mesüra mezüng COVID-19 vaccine agir alitsüla; aser mezüng Covid-19 dose agir sülen anogo 15(fifteen) dak tema abensatsüla. Vaccine magira, passenger temi RT-PCR/TrueNat mesüra CBNAAT ajanga agiba COVID-19 negative test report sayutsüla.

6. Item tetuyuba nung malibatam DTF den angatetepa jembir sülen DTF ase SDTF ajanga telemtetba agütsütsü.



## J.N. AIER COLLEGE

'C' Khel, 4th Mile Diphupar, Dimapur : Nagaland

### ADMISSION NOTICE FOR B.A. 1<sup>ST</sup> SEMESTER 2021

#### SUBJECTS OFFERED :

HONOURS :  
ENGLISH, EDUCATION,  
SOCIOLOGY, POLITICAL SCIENCE

GENERAL :  
ENGLISH, EDUCATION, SOCIOLOGY,  
POLITICAL SCIENCE, HISTORY

### Admission can be done through online as well as from the college office

For online Admission and form visit :

[www.jnaiercollege.in](http://www.jnaiercollege.in)

Email : [jnaiercollege@gmail.com](mailto:jnaiercollege@gmail.com)

For further queries contact :

8731845133/9862610736 • 7005255141

Office Timing : 9:00 A.M to 2:00 P.M on all working days

## PELABA LEMSATEPER

Onoki teti meima aliba **IMRONGTULA** (Molungkimong), mapang tatsüka shiranga alidang aser la tasünü tashi temolunger kija, kibong aser kiyongertem shirnokisa nübu, shisatsü, ronsen aser tongtipangsa sarasadem agi ozü nungita yariogo, nenok ajak dang kinungertemi pelaba lemsateper.

Maneni meshi melitet nung tsünglanglen agüja aliba lokti tentet tem dang pelaba lematerper:

- Dimapur District Task Force on COVID-19.
- District Hospital Dimapur nung Doctor aser Nurse tem.
- Dimapur Ao Baptist Arogo.
- Dimapur Molungkimong Senso Telongjem.

Asen teyanglur Tsüngremi nenok mapa tajung asoshi moajangma ta ozüi sarasademtsür.

**Temeim Oba, Oya, Odi aser Kinungertem.**



ASO : 15.03.1973  
ASÜ : 02.08.2021

## OFFICE OF THE LONGMISA SENSO MONGDANG

P.O MOKOKCHUNG 798601 B.P.O LONGMISA  
MOKOKCHUNG : NAGALAND

### TENÜNGSANG AGÜTSÜR

LSM ajanga wadang balala nung temaba jenjang angur item nem konang tetushi agütsür.

- Lt. Sashituden aser Mrs Temjenrenla jabaso Dr. S. Nungsangmongba Jamir Theology nung Thesis title "Reimagining Ecclesia in the context of Homophobia: Towards a relevant Church", dak ajemdaker Doctor of Philosophy takok tajung nguogo.
- Mr Luke aser Mrs Nangdenbenla na jala Dr.Tialila English Department nung Thesis "An Ecocritical Reading of Toni Morrison's selected Novels", dak ajemdaker Doctor of Philosophy takok tajung nguogo.
- Dr. Miyiwati Jamir aser Mrs Akumchila na jala Miss Sentiyaala Jamir-i Bachelor's Degree of Music and Education nung Academic Excellence award takok tulu nguogo.

Asen teyanglur Tsüngremi nenok taküm aser wadang ano temaba nung ajungketa moajangma ta sarasademtsür.

(Sademkaba)  
President

(Alemchuba)  
Secretary

# AJAK MEKÜMZÜK TASHI SHINGA KÜM-ZÜKA MALI

**ASENOKI KECHI MEMETET:** Covid-19 ya mapang kokpika tashi alitsü  
**ASENOKI KECHI METET :** Iba ya ajanga kanga mejungi shirangdaksür aser tanü tashinung iba wara ya ajanga alima nung nisung 42,27,359 dak tema süogo (Source:WHO)

#### NA ASER LOKTI KÜMZÜKA YUANG

- Mezüng meraji lokti nung iba wara agi timtemdaksüba aser prokba ajemdaksütsüla.
- Küm aika aliba Science amshia COVID-19 vaccine tem yangluogo. Vaccine yagi kümzüker aser mapa inyaker.

#### LENDONG DANG NUNGI TAJANGZÜK TULUBA

- Na mozü agiyonga iba wara agi meneptsü akok, saka iba tashidak tamajungba küma aoba aser tasüba tajemba akümer.
- Vaccine agir sülen nisung karbo anogo 2-3 tashi temang nung timtem talisa temang meta shirangba, temang ayangashiba aser anibelemba ajangshitsü. Iba tetezü, Vaccine agi mapa inyakerba.
- Temang, lokti aser rongseketsüng nung timtem ajemdaksür.
- Iba yagi Herd Immunity akümtsü. Ibaji ajanga tanurtem mesüra Vaccine agitsü mokoki shirangertem kümzüka ayutsü.

#### ASENOK MAPANG ARISHIBA TENSA KA NUNG LIR

- Nüburtemi mapang kobika vaccine magi lidir, yamaji virus tamajungba akümtsü aser vaccine agi mapa meinyaktettsüsa tensa arutsü.

## COVID-19 ANEMA NAGALAND NOKDAKER

Covid-19 aser danga temang timtem asoshi asüngdangyatsü atema yangi jembiang :  
State Help line  
No. 1800-345-0019/  
National Toll Free - 1075

## TETI TEKÜMDANGTSÜ MERATEM NUNG ANIDAKANG



WEAR MASK



WASH HANDS



SOCIAL DISTANCE



STAY HOME

\*Take all recommended doses of your COVID-19 Vaccine to get the Optimum level of Protection.\*



New Delhi, Luroi/August 03, 2021: Mongolbarnü, Indira Gandhi International Airport, New Delhi nung BAI aser SAI ketdangsürtemi Sindhu aser coach Park Tae-Sang (achiji) na agizükba mapang tangokba noksa ka yangi angur. Tang asaya aliba Tokyo Olympics nung, Badminton world champion PV Sindhu-i bronze medal takok angu. 2016 Rio Olympics nung Sindhu-i silver medal takok anguba sülen, taküm Tokyo Games nung lai Olympic medal tanabuba takok angur asütsü.

## August 15 nü Modi-i Indian contingent jaoktsü

**New Delhi, Luroi August 03, 2021 (Agencies):** August 15 nü Red Fort nung Independence Day sentong atema, Ato Kilonser, Narendra Modi-i Tokyo Olympics nung shilem agir Indian contingent pur jaoktsü. Kasa sentong nung, Modi-isa parnok den ajurutepa jembitsü.

Tokyo Games nung Indian contingent rongnung Weightlifter Mirabai Chanu-i silver aser badminton world champion PV Sindhu-i women's singles bronze takok

ngua lir. Kasa asayamung nung, boxer Lovlina Borgohain-i women's 69kg category semifinal tongteta, India-i ano medal ka angutsü asoshi teimla agütsüogo. Bodhbarnü, Lovlina-i Turkey tsür world champion Busenaz Surmenali den semifinal asayatsü.

India tebur aser tetsür hockey team anaprongla semifinal tongtetogo. Bodhbarnü India tetsür team-i Argentina den semifinal asayatsü. Ajisüaka, Mongolbarnü, tebur

hockey semi final nung India team-i 2-5 agi Belgium makok.

Bronze-medal atema, Brehostibarnü India tebur team-i Germany den asayatsü.

Maneni, Indian shooting contingent-i iba Games nung medal ishikabo angutsü imlaa liasü, saka parnok rongnung asayar kati dang final tongteta asaya. Wrestler asayar rongnung Bajrang Punia aser Vinesh Phogat; aser javelin asayar Neeraj Chopra nungeri India atema medal angutsü teimla lir.

## Tokyo Olympics: India tebur hockey team semifinal nung tsükogo

**Tokyo, Luroi/August 03, 2021 (Agencies):** Mongolbarnü, Oi Stadium nung India aser Belgium na tsüingda Tokyo Olympics men's hockey semifinal asayaogo. India team-i takok angutsü teimla tulu nung asaya liasü, saka world champion Belgium-i goal 5-2 agi India team tsükdaktsü.

Küm 49 nung India tebur hockey team-i tan Olympics nung mezüing semi-final tongteta asayaba mapang, parnoki gold medal takok angutsü ta nübur aikati imlaa liasü.

Iba asaya quarter tasembuba nung Manpreet Singh'er telok aser Belgium na tsüingda goal 2-2 kasa shi kümer asaya liasü. Ajisüaka, tia makai Belgium-i parnok ajatet aser asaya koktet. Tang, hockey asaya tsütsü World No. 2 nung alir Belgium telok ya team tajung ka ama ajaki züingshir. Telok anaprongla goal tie - 2-2 ser asaya aliba mapang, minute 15 nung Belgium-i goal 3 tashi atonga idaktsü.

Belgium atema, drag-flicker Alexander Hendrickx-i hat-trick idaktsü aser quarter tatembuba nung, külem team puri goal ana tashi idakja liasü. Ano külen, India team atema Hamanpreet Singh aser Mandeep Singh nati goal ka ka idaktsü, saka goal ana jagi mepiri aser Belgium-i

penalty corner ajanga goal timba idaktsütsü maongka angu. India-i Belgium nem penalty corner 14 tashi agütsü. Ajisüaka item penalty corner nungi Belgium-i goal 3 dang inoktsütet.

Quarter tatembuba nung captain Manpreet-i green card anguba ajanga India team kanga akoksa. Iba mapang, Belgium-i maongka agia minute 15 nung goal 3 tashi atonga idaktsü.

Iba asaya tenzükli minute 2buba nung World champion team Belgium-i goal ka idaktsü. Asaya tetenzüklen Alexander Hendrickx moapu telung nung külem team den masaya, saka penalty corner ka ajanga Loick Lupayert-i mezüing goal idaktsü.

India team-ia telangzüba agüja minute 7buba nung mezüing goal idaktsü. Drag-flicker Harmanpreet Singh-i iba goal idaktsü aser telok anaprongla goal 1-1 kumadok.

Iba goal sülen, India team kanga sashia asaya, kong Amit Rohidas-i yokba ball ka Mandeep Singh-i agizük aser India atema pai goal tanabuba idakja par telok goal 2-1 agi Belgium tejkadang kumadok. Tan Tokyo Olympics nung asaya arur sülen, semifinal nung Mandeep-i mezüing goal idakja liasü.

Mezüing quarter tashi India-i amokbanger asaya, saka Belgium-i penalty corner yoktsü maongka anguba mapang, tanabuba quarter nung India pur asaya yimya melenshiadok.

Minute 19buba nung Hendrickx-i Belgium atema goal tanabuba idakja telok anaprongla goal kasa shi aküm. Mezüing quarter asem tashi nung India team-i Belgium nem penalty corner 7 tashi agütsü.

World No. 3 team, India-i takok angutsü nükla yur iba Olympics nung shilem agiogo. Tesüiba küm ishika tejkadang nungi asayamung balala nung tamakok ngua aruba sülen, tan Olympics nung Manpreet Singh'er teloki shilem tajung agiba nguogo.

Tokyo Olympics Hockey asayamung tenzüka, India-i New Zealand madak goal 3-1 agi takok ngua tenzü, saka tanabuba asaya nung Australia team-i goal 7-1 agi parnok tsükdaktsü.

Teimla mesamai, India-i Pool A nung tanüingba asaya 3 tashi akoktsü asoshi meranga asayaogo aser asaya pungo nungi pezü tashi koka, parnok iba Pool nung tanabuba jenjang tongtetogo. Great Britain madak goal 3-1 agi takok ngur sülen, India team-i semifinal nung asaya liasü.

## Tokyo Olympics: Wrestler Sonam Malik tsükogo

**Tokyo, Luroi August 03, 2021 (Agencies):** Mongolbarnü, tetsür 62kg category wrestling tetoktepba nung, India tsür wrestler tasen Sonam Malik aser Mongolia tsür Bolortuya Khurelkhoo na asaya liasü. Taküm Olympics nung Sonam-i mezüing shilem agia asaya liasü, saka mezüing round nung la tsükadok.

Iba bout tetenzüklen arishi küm 19 Sonam-i 2-0 agi Khurelkhoo ajateta asaya, saka asaya atemtsü second 35 anünga lia Asian silver medal takok angula Khurelkhoo-i point' ana tashi ngua Sonam menepa asaya. Asayar anaprongla tsüingda point 2-2 kumadok, saka tatemlen Mongolia tsür Khurelkhoo-i tasa ajanga point anguba yong, 'criteria' nung la takoker ama tetendanger temi sangoktsü.

Kasa anogo, quarter final nung Bulgaria tsür Tayeb Mustafa Yusein-i Khurelkhoo tsükdaktsü. Seed tanabuba Tayeb ya 2018 world champion wrestler ka lir. Tayeb-i 'technical superiority' ajanga

Khurelkhoo madak takok angu. "Khurelkhoo dang nungibo Sonam tajungba asayaogo, saka defence' tsütsü kanga asayaba yong, lai aibelenadok. Iba aibelen ajanga la akoksa. Ajisüaka, asayar tasen ka ama sabang tuluka nung lai tasüita shilem agiogo," ta Sonam indang coach Ajmer Malik-i ashi.

Sonam-i 2017 aser 2019 küm Cadet World Champion asayamung anaben tashi kokdanga lir. Taküm April ita Almaty nung, Asian Qualifier asayamung nung lai final tongteta Tokyo Games nung shilem agitsü asoshi temsüa aküm.

Khurelkhoo ya asayar tejen ka lir aser la dak tajangshiba jenti aliba yong, iba bout akoktsü asoshi lai maongka ngutet. Maneni, Bodhbarnü Tokyo Olympics nung India contingent nungi wrestler Ravi Dahiya (FS 57kg), Deepak Punia (FS 86kg) aser Anshu Malik (WW 57kg) nungeri pei pei tata asaya nung tokteptsü terenemba lir.

## Congress aser Opposition party... (Tapak 7 nungi...)

Senden tembangba sülen totsü nung jenjang ajungketba anema Rahul Gandhi-i cycle ka nung mener Parliament-i ao.

Maneni Opposition party-i iba session nung longjemer inyaktü bangjem. Congress lenir tejen kati ashiba agi, "Pegasus osang temai adokba sülen party tir Sonia Gandhi-i Congress lenirtem dang kija masü saka opposition party tem den longjemer inyaktü tetuyuba agütsüogo."

Kasa mapang nung defence minister Rajnath Singh-i Hombar nikongtsütsü Opposition lenir ana den

tongtepratepogo.

Defence minister-i, Rajya Sabha nung Opposition lenir Mallikarjun Kharge aser Trinamool nungi Lok Sabha tekolakba Sudip

Bandyopadhyay den jembigo. Opposition lenirtemi ashiba agi, Parliament nung minprong anendaktsütsü atema Pegasus ken o ya kechi südir süaka sensak asemtsüla, ta shiogo. Monsoon Session tezüker mezüingbuba anogo nungi opposition party 13-i Pegasus ken o, aluyimba ozüing asem aser totsü jenjang tali akümba anema longkak aita arudar.

## Oxygen plants amenoktsü... (Tapak 7 nungi...)

April 23 nü Jaipur Golden Hospital nung oxygen agi anüingba ajanga shiranger 21 asü. Tughlakabad Institutional Area kübok Batra Hospital nunga May 1 nü oxygen agi anüingba agi nisung ti asü.

Oxygen agi anüingba nungi jenbotsü atema yimti sorkari oxygen generation plants amenokdar aser wara wave tasembuba atema renemshia atatsü atema shiranger 37,000 anepalutsü asoshi anepaludar. Ketdangsürtemi ashiba agi, yimti kübok sorkar

aser jurila mozük balala nung Pressure Swing Adsorption (PSA) oxygen generation plants 160 shi amenokdar aser item plant tem yagi oxygen metric tones 148.11 adokdaktsütsü.

Delhi sorkar mozükitem nung plant 66 amenokdar aser central sorkar mozükitem nung plant 10 aser private healthcare facility tem nung plant 84 amenokdar. Yimti sorkarisa LMO storage facility tem amenokdar aser cryogenic tankers 15 alizüktsü atema tender agütsüogo.

## BILEMDANGANG

"Bendanga agütsüra tamakok meshimeshia mali."